



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Is miràculus de Santu Pàulu de Monti

Una diri unu sennori ca si fiat sarvau de una grandu maladia, iat fatu sa promissa de andai scrutzu e a conca sciorta a sa crèsia de Santu Pàulu de Monti, pròpriu in sa diri de sa festa. Iat mantènniu sa promissa e a su mengianu chitzi, scrutzu e a conca sciorta, si fiat incaminau.

Sa genti cumentu e sempri acurriat de dònna bidda e su stradoni fiat prenu. S'òmini chi fiat caminendu po promissa, l'òmpiu a unu certu puntu, si fiat intèndiu umiliau e iat tentu bregùngia de totu custa genti e de nci passai in mesu scrutzu e a conca sciorta.

Intzandus si ndi bogat de sa bèrtula is crapitas e su capeddu, si bistit torra e àrtziat a cuaddu. Su cuaddu, arribau pròpriu in mesu de su stradoni si firmat e non si movit prus.

Sa genti passat e castiat cuss'òmini a cuaddu firmu in su stradoni, ma pariat ca non fessit sceti su cuaddu firmu ma fintzas s'òmini fiat firmu.

Meda genti iat crètiu ca fessit aici firmu po promissa e passant a innantis, ma calincunu iat cumentzau a s'acostai e a ddu domandai. Issu fiat amarmurau e podiat movi sceti is ogus, e cun custu movimentu fiat arrennèsciu a fai cumprèndi de ndi-ddu tirai is crapitas e su capeddu e de ndi-ddu calai de su cuaddu.

Apenas iat tocau sa terra su cuaddu si nci fiat fuiu e su meri iat incumentzau a si movi e a caminai. Iat basau sa terra e iat nau:

- Imui sissi Santu Pàulu miu, ca si creu.

E iat sighiu a bandai a pei e a conca sciorta faci a sa crèsia.

Sa mamma lastimosa

Una borta in Tèmpiu ddoi biviati una mamma ca teniat unu fillixeddu malàdiu. Custa fèmina ddi boliat beni cantu e prus de is ogus suos e dònna diri andat a sa crèsia de Santu Giusepi, ca s'agatat in su sartu de Tèmpiu, po ddu pregai chi du fadessit sanai.

Ma mancai essit pregau meda su pipiu non fiat sanau e est mortu. Sa diri apustis sa mamma est andada in cussa crèsia ma intamis de pregai, sa mamma at aciocau Santu Giusepi narendi-ddu:

- Oh Santu Giusepi miu! S'apu pregau aici meda po mi lassai sa bandera de is ogus mius, su bastimentu miu de oru e bosàterus mi-dd'eis pinnigau.

A cussu puntu me in s'altari sa fèmina tenit una bisioni de su fillu a mannu ca ddu fiant po impicai in sa furca. A custu puntu sa mamma s'ingenugat e torrat gràzias a Santu Giusepi po ndi-dd'essi bogada de unu dolori prus mannu.